

GALATAS

¹ Pablojon, apóstolon. Mach chocbilonic majlel i cha'an winicob mi ti' p'atłalelic winic. Chocbilon majlel i cha'an Jesucristo yic'ot Dios lac Tat tsa' bΛ i teche ch'ojoyel Jesús ba'an chameleon' bΛ. ² Joñon quic'ot pejtelel hermanojob wΛ' bΛ añob wolic ña'tañet lojon xñopt'añet bΛ la mu' bΛ la' tempan la' bΛ ya' ti Galacia. ³ La' aq'uentiquetla i yutslel yic'ot i ñach'talet la' pusic'al ch'oyol bΛ ti Dios lac Tat yic'ot ti lac Yum Jesucristo. ⁴ Tsi' yac'bΛ i bΛ ti chamel cha'an lac mul che' bajche' yom Dios lac Tat cha'an mi' loc'sañonla ti' p'atłalel jontolil am bΛ ti pañimil wale. ⁵ La' sujbic i ñuclel ti pejtelel ora. Amén.

Ma'anic yambΛ Wen T'an

⁶ Woli' toj sajtel c pusic'al come maxto anic ora tsa' la' ñopo, pero wale wolix la' cΛy Dios tsa' bΛ i pΛyΛyethla ti' yutslel i pusic'al Cristo. Woli la' cha' sutq'uin la' bΛ cha'an mi la' ñop yambΛ t'an. ⁷ Ma'anic yambΛ wen t'an. An winicob woli bΛ i tic'lañetla cha'an yomob i socben i wen t'an Cristo. ⁸ La' junyajlel chojquic ti Dios majqui jach mi' sub yambΛ t'an mach bΛ lajalic bajche' jini wen t'an tsa' bΛ c subu lojon, mi ángel tilem bΛ ti panchan o mi joñon lojon mu' bΛ c sub yambΛ t'an, la' chojquicon lojon. ⁹ Che' bajche' tsac subeyet lojon ti yambΛ ora wolic cha' subeñetla. Mi an majch mi' subeñetla yambΛ wen t'an yilal mach bΛ jinic tsa' bΛ lac ñopo, la' chojquic jini winic ti Dios. ¹⁰ ¿Woli ba c sajcan c ñuclel ti' tojlel winicob, o ti' tojlel

Dios? ¿Woli ba c cha'len chuqui uts'at cha'an mi' q'ueloñob ti ñuc winicob? Muq'uic c mel chuqui uts'at cha'an mi' q'ueloñob ti ñuc winicob, mach i winiconic Cristo.

Iye'tel Pablo cha'an jini Wen T'an

¹¹ Com c subeñetla hermanojob, mach ch'oyolic ti winicob jini wen t'an tsa' bΛ c subu. ¹² Ma'anic tsi' yΛq'ueyoñob winicob. Mach cΛntesΛbilonic i cha'an winicob. Jesucristo tsi' pΛsbeyon i sujmlle. ¹³ Tsa'ix la' wubi bajche' tsac ñopbeyob i costumbre israelob. Ma'anic i p'isol bajche' tsac tic'la i cha'año' bΛ Dios mu' bΛ i tempañoñob i bΛ. Tsac ñopo c jisañob. ¹⁴ Ti pejtelel i costumbre israelob ñumen bΛxon bajche' c pi'lob. Ñumen bΛxon ti' subol i t'an c ñojte'elob. ¹⁵ Dios tsi' yajcayon che' maxto anic tsa quila pañimil. Tsi' pΛyΛyon ti' yutslel i pusic'al ¹⁶ che' bΛ tsi' pΛsbeyon i Yalobil. Tsi' yΛc'Λ ti tsictiyel i Yalobil ti joñon che' bajche' yom i pusic'al cha'an mic sub Cristo ti' tojlel jini mach bΛ i cΛñyobic Dios. Che' jini ma'anic tsaj c'ajtibe winicob i sujmlle jini wen t'an. ¹⁷ Ma'anic tsa' majliyon ti Jerusalén ba'an jini ñaxan bΛ apóstolob, pero tsa' majliyon ti Arabia. Tsa' cha' tiliyon ti Damasco.

¹⁸ Che' ñumenix uxp'ejl jab, tsa' letsiyon majlel ti Jerusalén cha'an mij cΛn Pedro. Ya' tsa' jaleyon jo'lujump'ejl (15) q'uin yic'ot Pedro. ¹⁹ Ma'anic tsaj q'uele yambΛ apóstol, cojach Jacobo i yijs'in lac Yum. ²⁰ Awilan, ti' tojlel Dios mach c lotic jini woli bΛ c ts'ijbubeñetla. ²¹ Ti wi'il tsajniyon ti tejclum tac ya' ti Siria yic'ot ti Cilicia. ²² Ti jim bΛ ora maxto cΛmbilonic i cha'an año' bΛ ti Cristo mu' bΛ

i tempañob i bΛ ya' ti Judea. ²³ Tsa' jach i yubiyob chuqui woli' yalob yaño' bΛ: Jini tsa' bΛ i tic'layonla ti yambΛ ora wolix i sub jini wen t'an tsa' bΛ i lon ñopo i jisan, che'ob. ²⁴ Tsi' q'ueleyob i ñucel Dios ti joñon.

2

Jini xcΛnt'año ob tsi' ch'ΛmΛyob ti wenta Pablo

¹ Che' ñumenix chΛnlujump'ejl (14) jab, tsa' cha' letsyon majlel ti Jerusalén quic'ot Bernabé. Tsac pΛyΛ majlel Tito ja'el. ² CΛntesΛbilon ti Dios tsa' majliyon cha'an mic tsictesΛbeñob jini wen t'an mu' bΛ c subeñob gentilob. Tic bajñel lojon yic'ot jini hermanojob año' bΛ i ye'tel tsac subeyob pejtel chuqui tsac cha'le yic'ot pejtel j cΛntesa, cha'an uts'at mi' yujtel que'tel ti' tojlelob che' junlajal lac pusic'al. ³ Uts'at tsi' pejcayoño yic'ot Tito am bΛ quic'ot, anquese griego. Ma'anic tsi' xic'beyob cha'an mi' ch'Λm tsep pΛchΛlel, ⁴ anquese ya' año payxo hermanojob ti mucul tsa' bΛ ochiyob i yo-jch'oñon lojon cha'an libre añonla ti Cristo Jesús. Mi' yalob wersa mi lac chΛn jac' jini mandar cha'an mi laj coltΛntel. ⁵ Ma'anic tsac wis jac'beyob lojon come com lojon mi' chΛn ajñel i sujmlel jini wen t'an ti la' tojlel. ⁶ Jixcu jini wen cΛmbilo' bΛ año' bΛ i ye'tel ti' tojlel xñopt'año, ma'anic chuqui tsa' cΛntesΛntiyon ti' tojlelob. Mi ñucob ti' tojlel winicob ma'anic chuqui mi' cha'len, come junlajalonla ti' wut Dios. ⁷ Pero tsi' ña'tayob aq'uebilon tic wenta cha'an mic sub jini wen t'an ti' tojlel gentilob che' bajche' aq'uebil Pedro cha'an mi' sub ti' tojlel israelob. ⁸ Che' bajche' lac Yum tsi' wa'choco Pedro

cha'an mi' majlel ba'an israelob, tsi' wa'chocoyon ja'el cha'an mic majlel ba'an gentilob. ⁹ Jacobo yic'ot Pedro yic'ot Juan, mu' bΛ i q'uejlelob che' bajche' oy cha'an ñuc i ye'tel, tsi' ña'tayob aq'uebilon i yutslel i pusic'al Dios. Che' jini tsi' yΛq'ueyoñob cortesía quic'ot Bernabé ti ñoj bΛ i c'Λb cha'an mic majlel lojon ba'an gentilob. Jini uxtiquil tsa' majliyob ba'an israelob. ¹⁰ Tsi' subeyon lojon yom jach mic ña'tan lojon jini p'ump'uño' bΛ che' bajche' tsac bajñel ña'ta c mel ti pejtelel c pusic'al.

Pablo tsi' tiq'ui Pedro

¹¹ Che' bΛ tsa' c'oti Pedro ti Antioquía, tsac tiq'ui come an i sojquemal. ¹² Come che' maxto c'otemobic i pi'lob Jacobo, temel tsi' c'uxu waj Pedro yic'ot gentilob. Ti wi'il che' bΛ tsa' tiliyob jini winicob, tsi' tΛts'Λ i bΛ Pedro ba'an gentilob. Ma'anix tsi' chΛn pejcayob, come tsi' bΛc'ña jini mu' bΛ i cΛntesañob tsep pΛchalel. ¹³ Yaño' bΛ judíojob ja'el cha'chajp tsi' meleyob i pusic'al lajal bajche' Pedro. Che'Λch tsi' mele ja'el Bernabé. ¹⁴ Che' bΛ tsaj q'uele mach tojic woli' yajñelob ti' sujmlel jini wen t'an, tsac sube Pedro che' temel añob: Jatet anquese israelel, wola' mel bajche' jini gentilob. Mi ma'anix wola' mel bajche' israelob, ¿chucoch che' jini, ma' lon xic'beñob gentilob cha'an mi' melob lajal bajche' israelob? cho'on tsac sube.

¹⁵ Joñonla tsa' bΛ la quila pañimil ti Israel, mach i pi'alonicha jini xmulilob, gentilob. ¹⁶ Pero la cujil che' mi' ñopob Cristo mi' ñusΛbentelob i mul. Dios mi' yotsañob ti' wenta cha'an tsi' ñopoyob, mach cha'anic i jac'ol mandar. Mi' yotsañonla ti' wenta

ja'el che' mi lac ñop Cristo. Mi' ñusabeñonla lac mul cha'an tsa' lac ñopo, mach cha'anic i jac'ol mandar.

17 Pero che' woli lac ñop Cristo cha'an mi' yotsañonla ti' wenta, mi lajal mi lac taj lac mul bajche' jini mach bΛ i cΛñayobic mandar, ¿jim ba i mul Cristo? Ma'anic. **18** Mi tsa' cha' caji c ñop jini mandar che' bΛ tsa'ix j cΛyΛ, tsiquil xñusa mandaron. Che' jini an c sajtemal, come tsaj cΛntesayetla mi laj q'uejlel ti toj cha'an ti' ñopol Cristo, mach cha'anic ti' jac'ol jini mandar. **19** Che' bΛ tsac ñopo j coltan c bΛ ti' jac'ol mandar, ts'i' tsΛnsayon jini mandar yilal. ChΛmeñonix ti' tojlel jini mandar cha'an mic taj j cuxtΛlel ti Dios. **20** Isujm tsa' ch'ijleyon ti cruz yic'ot Cristo. Mach chΛn cuxulonix joñon, pero cuxul Cristo tic pusic'al. WΛle che' cuxulon tic bΛc'tal ti pañimil, wolic taj j cuxtΛlel ti' ñopol i Yalobil Dios tsa' bΛ i c'uxbiyon, tsa' bΛ i yΛc'Λ i bΛ ti chΛmel cha'añon. **21** Ma'anic mic ñusaben i yutslel i pusic'al Dios. Muq'uic laj q'uejlel ti toj cha'an i jac'ol mandar, lolom jach tsa' chΛmi Cristo.

3

Tsa' aq'uentiyob Espíritu che' bΛ tsi' ñopoyob

1 ¡Sojquemetla añet bΛ la ti Galacia! ¿Majqui tsi' socoyetla cha'an mi la' cΛy la' jac'ben i sujmlel jini wen t'an tsa' bΛ wen subentiyetla cha'an tsa' ch'ijle ti cruz Jesucristo? **2** Cojach com j c'ajtibeñeta: ¿Tsa' ba aq'uentiyetla jini Espíritu cha'an ti' jac'ol i mandar Moisés? ¿Mach ba cha'anic tsa' la' ñopo jini wen t'an che' bΛ tsa' la' wubi? **3** ¿Chucoch sojquem la' pusic'al? Tsa' caji la' ñop Cristo ti' p'atΛlel jini Espíritu. WΛle, ¿mu' ba mejlel la' taj la' wenlel ti

la' bajñel wersa? ⁴ Tsa' la' ñusa cabl wocol cha'an jini wen t'an. Mach to'olic jach. ⁵ Diosach mu' bΛ i yΛq'ueñetla jini Espíritu. Mi' cha'len ñuc bΛ i ye'tel ba' añetla. ¿Cha'an ba tsa' la' jac'Λ jini mandar? ¿Mach ba cha'anic tsa' la' ñopo che' bΛ tsa' la' wubi?

⁶ Abraham ja'el tsi' ñopo Dios. Jini cha'an Dios tsi' yotsabe ti' wenta. Tsi' q'uele ti toj. ⁷ Ña'tanla che' jini, pejtel mu' bΛ i ñopob Dios i yalobilobach Abraham. ⁸ WΛn ts'ijbubil ti' t'an Dios, mi caj i ñusabeñob i mul. Mi caj i yotsañob jini gentilob ti' wenta che' mi' ñopob Dios. Jini cha'an tsa' wΛn subenti Abraham jini wen t'an: “Ti a tojlel mi caj i tajob i wenlel pejtel tejclumob”. ⁹ Jini cha'an, majqui jach mi' ñop Dios mi' taj i wenlel yic'ot Abraham tsa' bΛ i ñopo Dios.

¹⁰ Come pejtelel mu' bΛ i ñopob i coltañob i bΛ ti' jac'ol jini mandar mi caj i chojquelob ti Dios. Come ts'ijbubil: “Mux i chojquelob ti Dios pejtelel mu' bΛ i wis cΛyob i mel ti ts'Λcal chuqui tac ts'ijbubil ti' juñilel jini mandar”. ¹¹ Tsiquil che' jini, Dios ma'anic mi' ñusaben i mul, ma'anic mi' yotsan ti' wenta mi juntiquilic cha'an ti' jac'ol jini mandar. Come mi' yΛ: “Jini otsabilih bΛ ti' wenta Dios cha'an tsi' ñopo Dios, cuxul mi' yajñel”, che'en. ¹² Mach lajalic i jac'ol mandar bajche' i ñopol Cristo, come mi' yΛ: “Jini mu' bΛ i jac' jini mandar ti ts'Λcal mi' taj i cuxtalet”, che'en. ¹³ Pero ya' ti cruz Cristo tsi' mΛñΛyonla loq'uel ti' p'ΛtΛlel jini mandar mu' bΛ i yΛc'onla ti chojquel, come tsa' chojqui ti Dios cha'añonla, come ts'ijbubil: “Chocbil ti Dios majqui jach mi' joc'chocontel ti te”. ¹⁴ Che'Λch tsa' ujti cha'an mi' tajob i wenlel gentilob ja'el ti Cristo

Jesús, che' bajche' Dios tsi' wʌn sube Abraham, cha'an mi lac laj aq'uentel jini Espíritu che' mi lac ñop.

Jini Mandar yic'ot jini Albil bʌ t'an

¹⁵ Mic cha'len lajiya hermanojob. Wʌ' ti pañimil che' mi lac ts'ijban ti jun bajche' mi' caj ti t'oxtʌl lac chubʌ'an che' mi lac chʌmel, ma'anic majch mi mejlel i jem. Ma'anic majch mi mejlel i xʌ' ts'ijban yambʌ t'an che' anix i sellojlel. ¹⁶ Dios tsi' yʌq'ue Abraham yic'ot juntiquil i p'olbal jini albil bʌ t'an. Ma'anic tsi' yʌlʌ i p'olbalob, pero i p'olbal, come juntiquil jach, jiñʌch Cristo. ¹⁷ Jiñʌch i sujmlel woli bʌ c sub: Dios tsi' wʌn subu cha'an mi caj i tilel Cristo. Che' ñumenix jumbajc' yic'ot lujump'ejl i cha'c'al (430) jab, tsi' yʌc'ʌ jini mandar. Jini mandar tsa' bʌ tili ti wi'il ma'anic tsi' jeme jini t'an tsa' bʌ i ñaxan alʌ. ¹⁸ Mi cha'anʌch jini mandar mi laj coltʌntel, che' jini mach cha'anic jini albil bʌ t'an. Pero Dios ti' yutslel i pusic'al tsi' colta Abraham che' bʌ tsi' yʌq'ue jini albil bʌ i t'an.

¹⁹ ¿Chuqui i ye'tel jini mandar che' jini? Dios tsi' yʌq'ueyonla jini mandar cha'an mi' tsictesʌbeñonla lac mul. Pero ma'anic i c'ʌjñibal jini mandar che' tilemix i P'olbal che' bajche' wʌn albil. Dios tsi' c'ʌñʌ i yángelob i yʌq'uen mandar Moisés i wenta xñusa t'an. ²⁰ Che' an juntiquil jach mach wersajic yom xñusa t'an. Pero Dios, che' bʌ tsi' lac'ʌ i t'an cha'an mi' coltan winicob x'xicob, tsi' bajñel wa'choco.

²¹ Jixcu jini mandar, ¿i contra ba jini t'an albil bʌ i cha'an Dios? Mach i contrajic. Actan tsa'ic

aq'uentiyonla laj cuxt^λlel cha'an ti' jac'ol jini mandar, che' jini, isujm^λch mi laj q'uejlel ti toj cha'an ti' jac'ol jini mandar. ²² Pero i t'an Dios mi' y^λl woli' yajñelob ti' p'^λt^λlel mulil pejtelel año' b^λ ti pañimil cha'an mi la c^λq'uentel jini albil b^λ ti Dios che' mi lac ñop Jesucristo, come majqui jach mi' ñop mi' colt^λntel.

²³ Che' maxto tilemic jini wen t'an mu' b^λ lac ñop, añon to la ti' wenta jini mandar. Ñup'ulonla jinto tsa' tsictes^λbentiyonla jini wen t'an mu' b^λ lac ñop. ²⁴ Jini mandar tsi' c^λntesayonla cha'an mi lac ñop Cristo, cha'an mi laj q'uejlel ti toj che' mi lac ñop. ²⁵ W^λle tilemix jini wen t'an mu' b^λ lac ñop. Mach ch^λn añonixla ti' wenta jini mandar. ²⁶ Iyalobiletla Dios ti la' pejtelel cha'an tsa' la' ñopo Cristo Jes^λús. ²⁷ Ti pejteletla tsa' b^λ ochiyetla ti Cristo ti Espíritu, tsa'ix la' xojo Cristo. ²⁸ Mi judíojet, mi griegojet, mi añet ti a yum, mi to'ol che' jach añet, mi winiquet, mi x'ixiquet, ma'anic chuqui mi' cha'len, come juntiquilet jach la ti Cristo Jes^λús. ²⁹ Mi i cha'añetla Cristo, mero i p'olbaletla Abraham. Mi caj la' taj chuqui mi la' w^λq'uentel che' bajche' albil i cha'an Dios.

4

¹ Yom mi la' ña'tan ja'el: Che' al^λl to jini mu' b^λ caj i y^λq'uentel i chub^λan i tat, lajal jach bajche' x'e'tel, anquese i yum^λch jini chub^λañ^λ. ² Anto ti' wenta xc^λntesajob yic'ot xc^λntayajob jinto mi' c'otel i q'uiñilel i jabil tsa' b^λ i w^λn al^λ i tat. ³ Che' ja'el joñonla che' alobon to la, mozojonla yilal. Tsa' lac jac'be i c^λntes^λbal lac ñojte'el che' bajche' i tilel mi' ñojpel ti pañimil. ⁴ Pero Dios tsi' choco tilel i

Yalobil che' b_A tsa' c'oti i yorajlel. Tsi' yila pañimil ti x'ixic. Tsa' ochi ti' wenta mandar ⁵ cha'an mi' m_Añonla loq'uel ti' wenta jini mandar; cha'an mi la cochel ti' yalobil. ⁶ I yalobiletla. Dios tsi' choco tilel ti lac pusic'al i yEspíritu i Yalobil mu' b_A i y_Al: Papa, c Tat, che'en. ⁷ Che' jini mach ch_An mozojetix la, pero i yalobiletix la. Mi i yalobiletla an chuqui mi caj la' w_Aq'uentel ti Dios yic'ot Cristo.

Mach yomic mi la' cha' ñop yamb_A c_Antesa

⁸ Ti yamb_A ora, che' maxto anic tsa' la' ñopo Dios, tsa' la' cha'le to'ol e'tel ti' wenta jini mach b_A mero diosic. ⁹ Wale mi la' c_An Dios, pero ñumen mi' c_Añetla. ¿Chucoc woli la' cha' mulan i c_Antes_Abal lac ñojo_E el mach b_A anic i p'_At_Alel cha'an mi' coltañetla? ¿La' wom ba la' cha' chujquel ti to'ol e'tel? ¹⁰ Mi la' mel q'uin ti' q'uiñilel tac, ti' yuwilel tac, ti' yorajlel tac, ti' jabilel tac. ¹¹ Woli la' w_Ac'on ti tsic pusic'al, ame lolomic jach tsac cha'le e'tel ti la' tojlel.

¹² Quermanojob, ti wocol t'an mic subeñetla. Ajñenla ti libre che' bajche'on, come ti yamb_A ora junlajal lac pusic'al. Ma'anic tsa' la' ts'a'leyon. ¹³ La' wujil tsac subeyetla ili wen t'an che' ti ñaxan che' ya' añon ba' añetla cha'an ti' caj tsi' tajayon c'am_Agel. ¹⁴ Anquese leco tsa' la' q'uele jini am b_A tic b_Ac'tal, ma'anic tsa' la' bi'leyon. Ma'anic tsa' la' ts'a'leyon. Tsa' la' p_Ay_Ayon ochel che' bajche' juntiquil ángel ch'oyol b_Ati Dios, che' bajche' Cristo Jesús. ¹⁵ ¿Baqui tsa' majli i tijicñ_Ayel la' pusic'al? Come mic ña'tan, tsa'ic mejli la' loc'san la' wut cha'an mi la' w_Aq'ueñon, tsa' la' loc'sa. ¹⁶ ¿Tsa' ba

ochiyon ti la' contra cha'an tsac subeyetla i sujmlel? ¹⁷ Jini yaño' bΛ bΛX mi' melob i bΛ cha'an mi la' c'uxbiñob. Pero mach uts'atic bajche' mi' melob. Yomob i tΛts'etla loq'uel tic tojlel lojon cha'an mi la' c'uxbiñob. ¹⁸ Uts'at mi bΛX mi' melob i bΛ ti chuqui uts'at ti pejtelel ora, mach cojic jach che' ya' añon la' wic'ot. ¹⁹ Calobilob, che' bajche' x'ixic woli bΛ ti bajq'uel, che'Λch wolic cha' ubin wocol cha'añetla jinto mi' tsictiyel Cristo ti la' pusic'al. ²⁰ Uts'at ya'ic añon la' wic'ot cha'an mic wen pejcañetla, come cabΛ woliyon ti tsic pusic'al cha'an mach cujilic bajche'añetla.

Lajiya cha'an Sara yic'ot Agar

²¹ Mi la' wom la' wajñel ti' wenta jini mandar, ¿mach ba anic mi la' ch'Λmben isujm jini mandar? Subeñonla. ²² Come ts'ijbubil an cha'tiquil i yalobil Abraham, juntiquil i yalobilΛch criada, yambΛ i yalobilΛch jini libre bΛ mach bΛ criadajic. ²³ I yalobil jini criada tsi' yila pañimil che' bajche' i tilel mi' yilañob pañimil alΛlob. I yalobil jini mero i yijñam bΛ tsa' tili cha'an albil bΛ i t'an Dios. ²⁴ An i sujmlel ili lajiya. Jini cha'tiquil x'ixic i yejtalΛch cha'chajp trato. Agar, jini criada, i yejtalΛch jini trato ch'oyol bΛ ti wits i c'aba' Sinaí. Tsi' q'uele pañimil i yalobil che' chucul ti to'ol e'tel. ²⁵ Jini Agar i yejtalΛch wits ya' ti Arabia i c'aba' Sinaí yic'ot jini tejclum Jerusalén ba chuculob ti to'ol e'tel jini ya' bΛ chumulob mu' bΛ i ñopob i taj i coltΛntel ti' jac'ol mandar. ²⁶ Pero libre jini Jerusalén am bΛ ti chan. JiñΛch lac ña' ti lac pejtelel. ²⁷ Come ts'ijbubil: "Tijicñesan a pusic'al, jochol bΛ x'ixic, mach bΛ anic a walobil. C'am yom ma' cha'len t'an, jatet mach

b_Λ anic a bajq'uel. Come ñumen cab_Λ i yalobil jini bajñel b_Λ x'ixic bajche' jini am b_Λ i ñoxi'al". Che'Λch ts'ibubil.

²⁸ Joñonla, hermanojob, tsa' la quila pañimil che' bajche' Isaac cha'an albil b_Λ i t'an Dios. ²⁹ Che' bajche' tsa' ujti ti' yorajlel Isaac che'Λch mi' yujtel wale. Jini mu' b_Λ i cha' ilañob pañimil ti Espíritu woli' tic'lantelob ti' tojlel jini yom b_Λ i yac'ob ti' jac'ol mandar. ³⁰ ¿Chuqui mi' y_Λ i Ts'ibujel Dios?: "Choco loq'uel jini criada yic'ot i yalobil, come i yalobil criada ma'anic mi' tem ch'Λm i chub_Λ'an i tat yic'ot i yalobil jini mero i yijñam b_Λ". ³¹ Jini cha'an hermanojob, mach i yalobilonica criada. I yalobilonla jini libre b_Λ x'ixic.

5

Librejonixla ti Cristo

¹ Librejonla. Cristo tsi' yac'ayonla ti colel ba' chuculonla. Jini cha'an yom libre mi la' ch_Λn ajñel. Mach mi la' cha' ac' la' b_Λ ti chujquel ti to'ol e'tel.

² Awilan joñon, Pablo, mic subeñetla, mi woli la' ch'Λm tsep p_Λch_Λlel, ma'anic i c'Λjñibal Cristo ti la' tojlel. ³ Mic cha' subeñetla, majqui jach mi' ch'Λm tsep p_Λch_Λlel, wersa mi' jac' pejtelel i mandar Moisés. ⁴ Ti pejteleletla mu' b_Λ la' lon ña'tan woli la' ch'Λjmel ti' wenta Dios cha'an i jac'ol jini mandar, chocbiletila ti Cristo. Mach c_Λy_Λletixla ti' yutslel i pusic'al Dios. ⁵ Joñonla tsa' b_Λ lac ñopo Dios woli lac pijtan laj colt_Λntel ti' p_Λt_Λlel jini Espíritu cha'an mi laj q'uejlel ti toj. ⁶ Come ti Cristo Jesús ma'anic chuqui mi' cha'len mi tsepbil lac p_Λch_Λlel, o mi mach tsepbilic lac p_Λch_Λlel. Pero jiñ_Λch mero

ganar che' ñopolix lac cha'an jini wen t'an mu' b_Δ
i y_Δq'ueñonla laj c'uxbin lac b_Δ.

⁷ Ti yamb_Δ ora tsa' la' jac'_Δ ti uts'at jini wen t'an.
¿Majqui ts'i' m_Δctayetla cha'an mi la' c_Δy la' ch'ujbin
i sujmlel? ⁸ Mach tilemic ti Dios mu' b_Δ i p_Δyetla.
⁹ Jas_Δ ts'ita' levadura cha'an mi' laj xaxan caxlan
waj. ¹⁰ C_Δy_Δlon ti lac Yum wolij c'ajtiben cha'an
mi' c_Δntañetla ame mi la' jac' yamb_Δ t'an. Dios mi
caj i y_Δq'uen i toj i mul majqui jach mi' tic'lañetla.
¹¹ Come ma'anic i tic'l_Δntel jini mu' b_Δ i sub tsep
p_Δch_Δlel, pero joñon wolic sub jini wen t'an cha'an
jini cruz. Jini cha'an wolic tic'l_Δntel. ¹² Uts'at
muq'uic i junyajlel tsepob i b_Δ cha'an mi' loq'uelob
ti la' tojlel jini woli b_Δ i tic'lañetla.

¹³ Hermanojob, tsa' p_Δjyiyetla cha'an libre mi
la' wajñel. W_Δle, mach la' jac'ben i tsuculel la'
pusic'al che' libre añetla. Ti la' c'uxbiya coltan la'
pi'lob. ¹⁴ Come uts'at woli la' jac' jini mandar ti
pejtelel che' mi la' jac' ili t'an: "C'uxbin a pi'lob
che' bajche' ma' c'uxbin a b_Δ", che'en. ¹⁵ Pero mi
woli la' c'ux la' b_Δ yilal, mi woli la' jach' la' b_Δ yilal,
tsajiletla ame la' jisan la' b_Δ.

Iy_Δc'bal jini Espíritu

¹⁶ Mic subeñetla: Cha'lenla x_Δmbal ti jini Espíritu
cha'an ma'anic mi la' jac' i colosojlel la' pusic'al.
¹⁷ Come i colosojlel lac pusic'al mi' contrajin jini
Espíritu. Jini Espíritu mi' contrajin lac tsucul pu-
sic'al. Jini cha'an mach mejlic la' mel jini la'
wom b_Δ la' mel. ¹⁸ Mi' woli' toj'esañetla majlel jini
Espíritu, mach chan añetixla ti' wenta jini mandar.

¹⁹ Tsiquil i mul lac tsucul pusic'al. Jini mu'
b_Δ i jac'ob mi' tajob i yxic, mi' cha'leñob ts'i'lel,

mi' melob chuqui bibi'. ²⁰ Mi' ch'ujutesaño ob dios tac, mi' cha'leño ob wujt, yujilob ts'a'leya yic'ot leto. Tsaytsayña jax i pusic'al cha'an chublaañl. Yu-jilob mich'ajel yic'ot a'leya. Mi' t'oxob i bΛ ti leto yic'ot ti yambΛ i ñopal. ²¹ Tsaytsayña i pusic'al cha'an i wenlel yaño' bΛ. Mi' cha'leño ob jontolil, yic'ot yac'ajel, yic'ot leco bΛ q'uiñijel yic'ot yan tac bΛ mach bΛ wenic. Mic cha' subeñetla che' bajche' tsac subeyetla ti yambΛ ora, jini mu' bΛ i cha'len che' bajche' jini, ma'anic mi caj i yochel ti' yumantel Dios.

²² Pero i yac'bal jini Espíritu jiñach laj c'uxbiya, i tijicñayel lac pusic'al, i ñach'tal el lac pusic'al, lac p'atłel ti' cuchol wocol, yic'ot p'untaya, coltaya, i xuc'tal el lac pusic'al, ²³ la cutslel, yic'ot i tic'ol lac pusic'al. Mach tic'bilik jini mu' bΛ i mel bajche' iliyi. ²⁴ Pejtelel i cha'año' bΛ Cristo tsa'ix i ch'ijiyob ti cruz i tsucul pusic'al yic'ot pejtelel i colosojlel yic'ot chuqui mi' mulan. ²⁵ Mi cuxulonla cha'an jini Espíritu, la' lac cha'len chuqui yom Dios ti' p'atłel jini Espíritu. ²⁶ La' laj cay lac chañ'esan lac bΛ. Mach yomic mi lac techbeñob i mich'ajel lac pi'łlob. Mach yomic tsaytsayña lac pusic'al cha'an i wenlel lac pi'łlob.

6

¹ Hermanojob, mi tsa' yajli ti mulil juntiquil winic, jatetla woli bΛ la' wajñel ti jini Espíritu, cha' toj'esanla ti' yutslel la' pusic'al. Q'uele la' bΛ ame p'ayquetla ti mulil ja'el. ² Coltan la' bΛ ti' cuchol wocol. Che' jini mi la' jac'ben i mandar Cristo. ³ Come mi an majqui mi' lon ña'tan an i bajñel wenlel, woli jach i bajñel lotin i bΛ. ⁴ Ti

jujuntiquiletla bajñel c^λñ^λ la' b^λ. Q'uele mi uts'at a melbal. Tijicñesan a pusic'al mi wen melbil, pero mach ma' chañ'esan a b^λ ti' tojlel yaño' b^λ cha'an a melbal. ⁵ Come an ti lac wenta lac melbal ti jujuntiquilonla.

⁶ Jini woli b^λ ti c^λntes^λntel ti' t'an Dios, la' i coltan i yaj c^λntesa yic'ot i chub^λ'an. ⁷ Mach mi la' w^λc' la' b^λ ti lotintel. Mach mejlic ti wajlentel Dios. Pejtelel chuqui jach mi' p^λc' winic mi caj i c'aj. ⁸ Jini mu' b^λ i p^λc' chuqui tilem b^λ ti' tsucul pusic'al, mi caj i c'aj toj mulil. Pero jini mu' b^λ i cha'len pac' ti jini Espíritu, mi caj i c'aj i cuxt^λlel mach b^λ anic mi' jilel. ⁹ Mach yomic mi lac lujban ti' melol chuqui uts'at, come tal i yorajlel mi caj lac cha'len c'ajbal mi ma'anic mi' lujban lac pusic'al. ¹⁰ Jini cha'an la' laj coltan pejtelel winicob che' i yorajlel to. Pero ñumen yom mi laj coltan jini mu' b^λ i ñopob Cristo.

Pablo mi' sub i ñuclel i cruz Cristo

¹¹ Q'uelela tsac ts'ibubeyetla ili jun ti colem b^λ letra tac tij c'^λb. ¹² Pejtelel yomo' b^λ q'uejlel ti ñuc mi' wersa xic'beñetla cha'an mi la' ch'^λm tsep p^λch^λlel, come mach yomobic i yubin wocol cha'an i cruz Cristo. ¹³ Pero jini woli b^λ i ch'^λmob tsep p^λch^λlel mach ts'^λallic woli' jac'ob jini mandar. Yomob jach mi la' ch'^λm tsep p^λch^λlel cha'an mi' q'uelob i b^λ ti ñuc cha'an i sellojlel ti' la' b^λc'tal. ¹⁴ Pero ma'anic mic s^λclan c ñuclel ti la' tojlel, cojach mi c^λc'ti ñuc i cruz lac Yum Jesucristo, come ya'ti cruz tsa' jili i p'^λat^λlel pañimil tic tojlel. Tsa' ch'ijleyon ti cruz cha'an ma'anic mic ch^λn mulan i cha'an b^λ pañimil. ¹⁵ Come ti Cristo Jesús ma'anic chuqui mi' cha'len mi tsepbil lac p^λch^λlel o mi mach

tsepbilic lac pach^halel. Pero mi cha' melbilonla ti tsijib jiñch yom b^h. ¹⁶ La' aq'uenticob i ñach't^halel yic'ot i p'untantel ti Dios pejtelel mu' b^h i melob che' bajche' wolic subeñetla yic'ot pejtel jini mero i cha'año' b^h Dios.

¹⁷ Mach i ch^han tic'lañon majqui jach an tij contra, come tsiquil i yejtal tac c lojwel cha'an i winicon Jesús. ¹⁸ Hermanojob, la' ajnic ti la' pusic'al i yutslel lac Yum Jesucristo. Amén.

**I T'an Dios
Bible without Deuterocanon in Chol Tumbala; ctu
(MX:ctu:Chol)**

copyright © 1977 Wycliffe Bible Translators, Inc.

Language: Chol

Translation by: Wycliffe Bible Translators, Inc.

Chol, Tumbalá [ctu], Mexico

Copyright Information

© 1977, Bible League International

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Chol

© 1977, Bible League International

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022
45de077a-5b47-572a-bd9d-72438a3be945